

I volontères, na ressorsa de gran emportanza

La Cèsa de Paussa e la Banca del Temp colaborea per la formazion di volontadives



Elio Liberatore, president de la Cèsa de Paussa, coi doi ghestes.

Sozièl - La A.P.S.P. de Fascia l'è na realtà n muie viva e vejina a la comunanza. Chiò vif chela persones che à de besegn de aiut a dò a dò, con malaties grieves o patologies particulères. N grum de volontadives va ogne di te Cèsa de Paussa per ge stèr apede ai ghesé, per ge portèr confort, ge fèr compagnia, i didèr a magnèr o te sia ativitèdes. Ma semper de più, te chesè ultim temp, l'è stat palesà fort l'besegn de la formazion di volontadives percheche i saesse resoner coche carenea ai besegnes di malé, che muda de spes e en prescia, n argoment uzà fora ence da la sociazion Rencureme e da la Banca del Temp. Sun chesè aon sentù Elio Liberatore, president de la A.P.S.P. de Fascia.

Chi él l'volontadif e che pelei fèr te Cèsa de Paussa?

Elio Liberatore: "L'Consei de

amministrazion peissa che l'volontadif sie na ressorsa n muie emportanta e per chesè l'è a cher l'raport con chesè persones che l'è na pèrt emportanta de na realtà delicata; i volontères l'è l'pont anter la comunanza e i ghesé che vif te la Cèsa de Paussa, l'è na fegura semper prejentata, che la é sentuda vejina dai malé, l'è n vis cognosciù.

Defat sion dò che envia n vif nef percors con chesè persones. De jené aon tacà co na pruma scontrèda coi volontadives, che i é più che 50 spartii anter desvalives gropes e turni, percheche aon vedù che l'besegn de se reportèr con patologies coscita complichèdes obliga a na certa sort de formazion. Per chesè aon sentù l'besegn de aer n confront ence co la Banca del Temp e co la sociazion Rencureme. Te l'ultima scontrèda de la Banca del Temp é chierì de spieghèr che che vel dir fèr l'volontadif te n

ambient olache la compagnia l'è la soramessa su la medejina e l'grignot su la terapia, olache la relazion cogn esser chela che ne desc la marcia en più. Per me l'è emportant che l'volontadif sie umol, che l'è sie prejent senza giudizie percheche a giudichèr chel che no se cognosc se fala semper. Più o manco da n an e mez aon metù sù l' "focolare", n post n muie protetif envers la persones più delicate, l'è vegnù fora domanes e curiosità. Vèlch sozio de la Banca del Temp à domanà se fossa possibol se arvejinèr de più a chesè problematiches leède apontin a la demenza. Chiò te l'A.P.S.P. aon fat n muie de formazion, 160 ores, ma esser da soi no bèsta, l'volontadif l'è l'opportunità en più per la comunità de stèr più vejina a chesè persones. Se aon metù d'acort coscita con chesè tre persone per envièr via n percors nef de formazion te Cèsa de Paussa. Cogne dir che l'è na gran fam de saer da noscia pèrt e da l'autra, se chisc doi besegnes va ensemma segur ruaron a aer n volontadif formà per stèr vejina a chesè persones, per didèr l'infermier, l'assistent sozio-sanitar, l'dotor, la strutura."

Che él l'focolare e cotenc de ghesé él ite?

"L'focolare l'è n partiment de la Cèsa de Paussa riservà e dedicà ai ghesé malé de Alzheimer, olache no l'è ritmes, olache cogn esser jent enjignèda a ge stèr dò coche carenea. Chiò aon 7 ghesé malé de Alzheimer, ence se l'è senester diagnosticchèr chesè sort de malatia che porta mudamenc de personalità violenc, ma no percheche la é violenta la persona, ma percheche l'è la malatia che li porta a esser coscita. L'è mudamenc che porta tema e padiment. E chiò ge vel n percors che se pel fèr demò co la formazion, co la cognoscenza di problemes."

Él n besegn n muie sentù chel de formèr volontadives?

"Sci, te duta la robes. Doventèr veies vel dir perder pian pian duc i movimenc, ence per chesè rejon aon volù che ades sie chiò a temp pien ence na logopedista."

Colaborède co l'autra sociazions che se desc jù tel ciamp sozièl?

"Sci, vardon semper de colaborèr. L'fat l'è che no sion usé al confront, ades mingol a l'outa sion dò che luron su la sinergia percheche te chesè strutura e te la sociazions l'è ite persones n muie atives e sensiboles."

Che n pissède del "Consei Ladin de la jent de età"?

"Son n muie d'acort. Gé son chiò da doman fin da sera, desche i etres, e vedon cotant che pel dèr la persones de età: saer, storia,

esperienzes, encebèn con duta la dificultèdes patologiches, les pel semper dèr vèlch. Delaite da na strutura desche chesè ogne di l'è vèlch da emparèr. N consei fat de jent de età per la val l'è segur n arricchiment per la comunanza."

Cotenc de ghesé aede ades?

"Aon pien, sion leé al numer de 40 accreditede convenzioné, i etres pel vegnir ite demò se l'è caji urgenc e per chesè no podon resoner ai besegnes de la val. I etres 24 posé che vanza vegn gestii da la Provinzia. Fossa na gran domana te val e na longia lista de chi che speta e assane ence dut l'personal che besegna, ma che podessa sblochèr chesè situazion l'è demò la pèrt politica."

Intervista de
Monica Cigolla

L'Consei Ladin de la jent de età

Tedant a l'evoluzion demografica, che pèrveit che del 2030 n chèrt de la jent sarà de età, l'è de gran emportanza pèrver n aparat a mesura de veies per la despozisions legislatives-organisatives tel chèder sozio-economiche e sanitarie-assistenziali. Per chesè, ence aldò de chel che stabelel l'art. 7 de la lege provinzièla del 2008, che sostegn na efetiva partezipazion di veies a la sozietà ativa, Floriano Bernard, president de la Banca del Temp, à metù dant la proponeta de l'istituzion de n "Consei Ladin de la jent de età" che raprejent legitimamenter i enteresc sozio-economiche e sanitarie-assistenziali de la jent de età de la val ti confronc del Comun general, di comuns e de l'autra istituzions, valorisan coscita la funzion sozièla che porta dant la organizazion de volontariat, la sociazions de promozion sozièla, la Banca del

Temp ladina, i zircoi, la sociazion Rencureme. Chesè co l'obietif de recognoscer la degnità de la persona sorafora l'età, la capazitèdes e l'atività produttiva, per didèr a dovntèr veies a na vida miora, garantir na vita degnitosa, arseguir l'èrit a la sanità, miorèr la parbuda de la jent de età te la publica opinion, sostegnir la partezipazion de la jent de età te la sozietà, a duc i livie, fajan crescer coscita la solidarietà anter la generazions.

N veie sèvehc disc: "canche mor na persona de età, l'è na biblioteca de bruja". Fèr a na vida che no la bruje per nia - scif Floriano Bernard - ma salvèr l'recort e si preziosc ensegnamenc l'è n doer de duc e amò de più l'cogn esser per chi che é stac chiamé a ge garantir la memoria. L'Consei Ladin de la jent de età se met dant l'obietif de dovntèr garant, per duc i veies de aldidanché e del davegnir."

I studenc cognosc i donatores

Te na scontrèda te Sorastanza a Poza 90 joegn é stac enformé sul mond de la donazion de sanch e plasma, megola de l'os, orghegn e ence del cordon del venter



La Sorastanta de la Scuola di Fascia Mirella Florian à endrezà na scontrèda anter donatores e studenc.

Scola - I studenc de la quintes e de la quartes del Liceo Scientifiche e de la Scola d'èrt enstadì i à abù l'met de cognoscer mingol più da vejina l'mond de la donazion. Con chela apontin de se arvejinèr al mond di joegn e de meter n pont de contat anter chesè doi realtàdes, raprejentanc de la sociazions de donazion a livel de noscia Valèdes e ence al più aut livel naziònel é rué a rejonèr te la scoles.

90 joegn se à binà per scutèr e poder domanèr fora l'dr Carlo Rovati da Milan, l'dr Alessandro Reich da Trent, duc doi vejins a la sociazion donatores de orghegn (AIDO), l'dra Silvia Nones, mamana de l'ospedèl de Ciavaleis e referenta de la donazion del sanch de l'embracion del venter e de la membrana amniotica. E ence amò

Piera Ciresa, presidenta de l'AIDO de Fiem, Gabriella Deflorian, referenta de la sociazion de donatores de megola de l'os (ADMO) de Fascia e Fiem e Clerio Bertoluzza, president de la sociazion donatores de sanch e plasma de la Veisc (ADVSP).

L'è stat n dadoman de informazion che à abù chela de fèr entener l'emportanza del mond de la donazion, che à debsegn dalbon demò de n picol didament en più che serf per salvèr la vita de na persona.

Travers n bel filmat che à tocià daite bec e ensegnanc duc à podù veder che che vel dir esser donatores, ma soraldut malé e "trapianté". La stories de vita de chesè persones les fèsc pissèr n muie e soraldut les ne desc na

spenta percheche na persona sèna l'è na persona fortunèda. Fora de n bel nia la vita muda e duc nos, soraldut i joegn, i à dassen l'met de didèr i etres: bèsta demò n picol, picol segn, e se podesse ence ruèr a salvèr na vita.

Ma dut chesè ge vel l'fèr con cef. Per chesè te Sorastanza l'è stat fat n gran lurier de informazion sottrisan che dassen te noscia Val la donazion l'è n setor emportant e rich de volontadives. Ogne lunesc fora Ciavaleis o a Poza l'zenter de regoeta de sanch l'è pien de donatores, de la neva mères l'97% les desc sie cordon e sia membrana per la donazion.

Duc chisc donatores l'è jent desche nos, che à sapù jir sorafora chela linea sotila che spartesc l'dir dal fèr. (vr)